

22 ALFONSO PAZ ANDRADE

VICEPRESIDENTE DA FUNDACIÓN CASTELAO

“CASTELAO DEBE SER O ESPELLO PARA O NOVO ESTATUTO



Paz Andrade afirma que, como vicepresidente da Fundación Castelao, cómprelle nesta data sinalada facer sentir o sentimento e pensamento da fundación.

“Queremos ser unha nacionalidade señora de si mesma”, explica. “Necesitamos ser oficialmente o que dende hai séculos somos naturalmente”. Segundo o empresario, “ninguén pode negar” que “Galiza é unha unidade histórica, xeográfica, con lingua de seu, con tradicións...”, e engade que “non hai que ter ningún xeito de medo en reconecelo”. En consonancia co anterior, argumenta que “non se trata de sectarismos de vía estreita” senón de que “o noso sentimento xorde de maneira emotiva do noso ser”. Así, demanda “a necesidade dun novo Estatuto como lexítima aspiración constitucional, xustificada nunha autonomía, diferenciada e respectuosa, co noso e co dos demais”. En nome de todos os patronos da Fundación Castelao, Paz Andrade transmite que “o sentimento galeguista é moito máis ca un partido político, é unha conciencia nacional en acción”, que de aí brolla a “importancia de conseguir para Galiza un Estatuto capaz de xerar a enerxía intelectual e patriótica que dea resposta a unha clara necesidade que ten formulada o país”.

Paz Andrade lémbrese de Castelao e afirma que é unha “figura unanimemente respectada polos galegos, paradigma da ética dun pobo”, ademais “da figura que mellor interpreta Galiza”, pois “nel se ofrecen exemplos definitorios do devir galego”. Por último, engade que o escritor é “o espello no que necesariamente se ten que mirar Galiza no intre de redactar un novo Estatuto”.

25 CESÁREO SÁNCHEZ IGLESIAS

PRESIDENTE DA ASOCIACIÓN DE ESCRITORES EN LINGUA GALEGA

“O ESTATUTO ACTUAL NON COLMA OS ANXEIOS NACIONAIS”



Cesáreo Sánchez considera que o actual Estatuto “non colma os anxeios nacionais, as expresións nacionais de Galiza”. O escritor cre que a modificación é precisa “para que a nosa lingua teña un lugar de centralidade na acción do Goberno galego e para levala a todos os ámbitos do ensino, da vida pública e da Administración”. “Facela algo prioritario no que facer do noso pobo”, resume, e continúa constatando que “se somos o que somos, é pola lingua”, polo tanto “o futuro como pobo, como nación, está no idioma”. Por iso é preciso, argumenta, que “a cidadanía

nos primeiros anos de escolarización viva en galego. É fundamental que nun novo Estatuto se defenda isto”.

Naliña da defensa da lingua escrita, Sánchez declara que “a literatura é fornecedora dos contidos da industria cultural”, polo tanto, “prestarlle apoio á cultura nos seus máis diversos ámbitos levaría a que Galiza, dentro de Europa, tivese unha industria cultural máis potente”. Así, un novo Estatuto tería que “facer da nosa cultura un dos recursos produtivos máis importantes do propio país”. Sánchez Iglesias refírese tamén ao galego no contexto global cando declara “o Estatuto tamén debería dotar de plataformas e institucións que reforzasen a presenza do galego no mundo” e engade que “a lingua e a cultura é o que abre os camiños á economía”.

23 SALUSTIANO MATO

REITOR DA UNIVERSIDADE DE VIGO

“HAI QUE AUMENTAR AS COMPETENCIAS EN INVESTIGACIÓN”



“En Galicia, as universidades necesitan máis ferramentas para desenvolver o noso potencial, que interesa tanto á propia comunidade como ao conxunto do Estado. As mellores no autogoberno de Galicia repercutirán positivamente no resto do Estado. Para iso é fundamental dotar a Galicia de maiores competencias no campo da investigación e desenvolvemento tecnolóxico. O Estatuto debería fomentar unha visión máis clara das estratexias de desenvolvemento vinculadas sempre á economía. Outra razón a ter en conta é a da urxencia de defender a cultura e a lingua propia de Galicia, potenciala dende a formación superior. Non só para fortalecer a autoestima senón para ter unha maior presenza internacionalmente”.

24 PILAR GARCÍA NEGRO

PROFESORA E EX DEPUTADA

“OS GALEGOS RECOÑECÉMONOS UNHA NACIÓN”



Pilar García Negro afirma que o 25 é “unha data histórica para o nacionalismo galego contemporáneo, a unión máxima de todos os galegos”, e engade que “os galegos nos reconecemos unha nación”. A escritora declara que esa é a “reivindicación” que se debe levar a cabo porque “o marco xurídico-político español no que nos atopamos non practica a democracia e a pluralidade nacional”. Deste xeito, afirma que a Constitución ten que “adaptarse ás diferenzas do Estado, abandonando o totalitarismo actual, que obriga legalmente a unha única nación, unha soa patria, unha soa nacionalidade e a existencia xurídica dun único pobo”. Ao fío disto, García Negro engade que “é o legalmente imposto, pero debe reivindicarse”.

Agora é cando, Galicia é onde

25 de Xullo, día de Galicia

XACORBE 2010 Galicia

XUNTA DE GALICIA